

Nova generacija je potrebna politici

Vrijeme je da mladi ljudi razbiju kalup politike u Bosni i Hercegovini, rekao je visoki predstavnik danas u Sarajevu.

“Perspektiva koju vi imate je svježa i nije okaljana neuspjehom”, rekao je visoki predstavnik učesnicima na Međunarodnom omladinskom samitu. “Vrijedi izaći iz klišea koji definiše politiku u ovom dijelu svijeta, a vi imate sposobnost da razmišljate van tog klišea.”

Visoki predstavnik je upozorio da ako promjena ne dolazi iz politike ona će proizaći iz nasilja kojeg je već bilo previše u BiH. “Ono čega je bilo premalo”, dodao je, “su mladi ljudi u politici. Kada poduzmete aktivnost mijenjate način na koji vaše okolnosti utiču na vas – vi počinjete da utičete na vaše okolnosti. Možda nećete uspjeti, možda ste odabrali pogrešan put, možda se pogriješili u vašem rasuđivanju ili ste razočarani rezultatima vaših napora – ali sve to je relativno. To je zato što kada djelujete vi mjenjate raspoloženje vašeg okruženja. Vi počinjete da utičete na ono šta će se desiti.”

Visoki predstavnik je također upozorio mlade ljude od kojih je većina razumljivo obeshrabrena politikom da ako oni ne preuzmu inicijativu, drugi će to uraditi. “A oni koji su preuzeli vođstvo u nedavnoj historiji Jugoistočne Evrope nisu bili uvijek uspješni. Na primjer, dok je nacionalizam crpio političku energiju, umjesna pitanja, pitanja egzistencije i pitanja koja su imala direktan uticaj na kvalitet života građana su vrlo često bila zanemarena. Škole su radile bez grijanja, organizovani kriminal se širio uništavajući živote putem droge i nasilja, a tinejdžeri su morali da razmišljaju o mračnim prospektima koje im je nudilo potpuno neadekvatno tržište rada.”

Visoki predstavnik je pozvao mlade ljude da preuzmu kontrolu nad politikom od pojedinaca i interesa koji su koristili ovlaštenja, a nisu pružili mnogo kad je u pitanju korist za većinu građana. "Oni koji trenutno dominiraju političkom debatom vam neće spremno ustupiti mjesto", rekao je visoki predstavnik. "Vi morate da preuzmete inicijativu sami za sebe. Morate da uzmete ono što vam s pravom pripada – pravo odlučivanja o budućnosti, vašoj budućnost. Ako postoji glavna poruka koja treba da proizađe sa ove konvencije, nadam se da će to biti sljedeće: došlo je vrijeme da mladi ljudi Jugoistočne Evrope izađu iz sjenke u prve redove politike. Vi imate mjesto u političkoj debati i sada je vrijeme da zauzmete to mjesto i stvorite bolju budućnost za sve."